

## Iluarsiissut

Siunnersuut 10. marts 2023-meersoq taarserpaa  
(Kalaallit taaguusersuutaannut ukununnga; meeqqat illersuisuat, inuit innarluutillit illersuisuat  
aamma utoqqaat illersuisuat aaqqiisoqarpoq)

**Uunga siunnersuut: Meeqqat illersuisuat aamma Meeqqat pillugit Siunnersuisoqatigiit pillugit Inatsisartut inatsisaata allangortinneqarneranut, Inuit Innarluutillit illersuisuat pillugu Inatsisartut inatsisaata allangortinneqarneranut, Utoqqaat illersuisuat pillugu Inatsisartut inatsisaata allangortinneqarneranut, Isumaginninnermik suliaasaqarfimmi pissaanermik atuneq pillugu Inatsisartut inatsisaata allangortinneqarneranut kiisalu Inuit Pisinnaatitaaffii pillugit Siunnersuisoqatigiit pillugit Inatsisartut inatsisaata allangortinneqarneranut Inatsisartut inatsisaat (Illersuisumut kalaallisut taaguutip oqaatsitigut iluarsiiffiginissaa) (Meeqqanut, Inuusuttunut, Ilaqutariinnut Peqqissutsimullu Naalackersuisoq)**

### Saqqummiussissut

(Meeqqanut, Inuusuttunut, Ilaqutariinnut Peqqissutsimullu Naalackersuisoq)

### Siullermeerneqarnera

Kalaallit illersuisuinit (Meeqqat Illersuisuat, Inuit Innarluutillit Illersuisuat aamma Utoqqaat Illersuisuat) illersuisut pillugit Inatsisartut inatsisaanni ”illersuisumut” kalaallisut taaguutip allangortinneqarnissaa pillugu ataatsimut kissaateqarsimaneq pillugu Naalackersuisut 2021-mi decembarimi saaffiginissummik tigusaqarsimanerat inatsisissatut siunnersuuteqarnermut matumunnga tunngaviuvoq.

Inatsisartut inatsisaanni taakkunani kalaallisut oqaasertaliinermi oqaaseq ”Illersuisoq” illersuisunut tunngatillugu qulequttatut atorneqarsimavoq. Illersuisut malugeqqaat ”illersuisoq” eqqartuussivinni illersuisartutut imaluunniit inunnut ataasiakkaanut illersuisinnaasutut paasineqarsinnaammat. Assersuussisoqassappat oqaariartaaseq taanna Meeqqat tapersorsorneqarnissaannut Inatsisartut inatsisaanni aamma Inuit Innarluutillit tapersorsorneqarnissaannut Inatsisartut inatsisaanni isumaginninnikkut suliani illersuisoq pillugu atorneqartarpoq taannalu kommunini sulianik suliarinninnermi innuttaasunut siunnersuinnermik tapersorsuinnermillu ikiuuttussaavoq.

Naalackersuisoq tamanna tunngavigalugu illersuisunut kalaallisut eqqortumik taaguutissap nalilersuiffigineqarnissaanik Oqaasiliortunut qinnuiginnissimavoq. Oqaasiliortut illersuisut isumaqatigalugit aalajangersimapput ”pillugit oqaaseqartartoq” siunissami illersuisumut taaguutit akuerineqarluni atuutsinneqassasoq.

Taamaammat siunnersuummi matumani Meeqqat Illersuisuat aamma Meeqqat pillugit Siunnersuisoqatigiit pillugit Inatsisartut inatsisaanni, Innarluutilinnut Illersuisoq pillugu Inatsisartut inatsisaanni aamma Utoqqaat Illersuisuat pillugu Inatsisartut inatsisaanni kiisalu inatsisini oqaatsit taakku taaneqarfianni oqaatsitigut iluarsiinissat suliarinissat siunertarinearpoq. Siunnersuut atortutigut allanguinnermik imaqqanngilaq taamaamallu ”illersuisup” kalaallisut taaguutaata allangortinnissaa kisimi pineqarluni. Taamaammat inatsisini kalaallisut allanneqartut allangortinnissaat kisimik pineqarput.

Taamatut oqaaseqarlunga Naalackersuisut immikkoortoq Inatsisartuni suliarisassanngorlugu ingerlateqqippaat.